

苗栗縣西湖鄉僑文國民小學客語創意說唱戲劇學習腳本

題目：山城苗栗好觀光

甲：三灣頭份竹南連，景寫南庄雁寫天，苗栗後龍頭屋抱，銅鑼敲破西湖煙，通霄三義大湖遙，路隔獅潭想造橋，浴罷泰安公館宿，卓蘭苑裡惹魂消。

乙：哎！你在个嘍嘍弄弄，唸麼个呀！

甲：就係這擺暑假吾爸為了分大家瞭解自家生長个地方，一屋家人邏邏聊聊，行遍十八鄉鎮，想到苗栗詩人賴江質先生作个十八鄉鎮山歌，實在很搭句，當有搭確叻！

乙：講到搭確！這擺正係有搭確哪，去奈聊你知有？

甲：你去奈，講來聽啊！

乙：這擺暑假，一放假，吾爸又乜戴等一屋家人，先去日月潭坐纜車。哈！个人山人海，塞車塞到會死，好不容易去到日月潭，就等坐纜車，就等忒會兩點鐘也，坐轉來，煞煞又拼到高雄个安到麼个哩…个麼个名咧…。

甲：係毋係"義大世界"？

乙：對對對對，就係"義大世界"，你樣會知喏？

甲：有食過豬肉，嗎有看過豬行路！你看你哪，聊轉來，就還毋知係麼个所在！實在啲！

乙：哈！飯店裡背有當多設施像三溫暖，SPA 水療設備當奢華哦！

甲：个問你，你呀兜透夜拼下去，毋係當癩嘿！你有享受到奢華个設備有？

乙：嘿!... 有啦！因為一上車大家就睡到咕咕滾，去到飯店四蹄筆直有翻身也有轉側，一覺到天亮，癩死也！

甲：个恁餒，你也兜實在很打賞，實在當八拜唷！

乙：有辦法哇！為了趕行程，中來中去！

甲：个又何麼死苦喏！

乙：但係恩苗栗就係有麼个好聊个地方啊？

甲：哼！近廟欺神就係你哪！ 問你，你係苗栗人有？

乙： 當然係呀！吾爸吾姆吾公吾婆吾太吾姐公吾姊婆……

甲：好… 毋係同你身家調查， 只係問你，你係苗栗人可知苗栗事
啊。

乙：這個嘛…个你講兜苗栗事 聽看哪！

甲：苗栗又名係山城，分到三部份海線、山線、中港溪，先講海線有
麼个？

乙：哦！有河洛人哪！

甲：係啦！毋單只有河洛人， 講分你聽，苗栗南片苑裡庄，草笠名
聲四海揚，通霄也有馬家庄，也算總統个故鄉，過年初二發紅包，
發分大家添福添壽財丁又兩旺。

乙：恁好喔！今年 乜愛來分紅包！再過上咧。

甲：再過上，後龍西瓜透心涼，造橋牛奶濃又香，竹南又有龍鳳港，
愛食海產這位嚐！

乙：海產食咧，牛奶飲乜，西瓜也買吔！還有那好聊有？

甲：竹南一過順等中港溪水上，就係工業所在地出名个頭份庄；隔壁
三灣梨，又甜又脆食咧發夢就會想；經過獅頭山，佛教聖地分人
由心來敬仰；拜佛完畢到南庄，出名个桂花巷，真多古蹟分你來
觀賞，還有矮人祭，分你跳舞跳到大天光；抬頭望：獅潭仙山雲
端上，有聽講，仙水係治病好良方。

乙：有影也有影， 乜裝兜轉來食轉來嚐。

甲：治病毋到食水也係會健康，溜下來泰安溫泉好泡湯，豆腐街肚老豆腐、嫩豆腐，愛食豆腐這位盡開放，食完豆腐泡完湯，一身疲勞走光光。落到田肚巷，摘到大湖草莓趕鮮嚐，摘完草莓你遽遽到公館食芋粄，紅棗飯，撈个三層覆菜湯。來到頭屋，看个明德水庫好風光；轉到苗栗市中央，政經所在地！有个三山國王廟，係 客家民眾大家个信仰；又來到西湖鄉有全台最大个石雕媽祖娘，文旦甜、蕃薯香；一出五湖庄來到銅鑼鄉客家大院、客屬園區在裡往，一片杭菊在田洋，杭菊茶飲落去，包你神清氣又爽。

乙：正經恁好嘿！

甲： 毋會耗小隨便講，來到三義个街巷，木雕藝品歸路項，鬼斧神工，樣樣逼真樣樣像。最後來到苗栗个最南項，就係卓蘭水果鄉，楊桃、椪柑、甜柿、葡萄項項甜又香。講忒十八鄉鎮个地方，毋知你那位還不詳？

乙：哈！苗栗山城實在好地方，有食有聊，實在好觀光。

合：歡迎大家苗栗聊，包你收穫滿行囊啊！滿行囊！